

08 AUG 2003

Ling-MCA

SOKONGAN PADU AMAT PENTING BAGI PERPADUAN PARTI - DR LING

KUALA LUMPUR, 8 Ogos (Bernama) -- Bekas presiden MCA Datuk Seri Dr Ling Liong Sik menggesa semua anggota memberikan sokongan yang tidak berbelah-bahagi kepada kepimpinan baru parti itu.

Merujuk kepada presiden MCA Datuk Seri Ong Ka Ting dan timbalannya Datuk Chan Kong Choy yang baru dilantik, beliau berkata kedua-dua pemimpin itu mempunyai kewibawaan untuk menerajui parti.

"Berikan sokongan penuh anda kepada dua pemimpin muda ini. Mereka berpandangan jauh, mendalam dan mempunyai banyak idea untuk membawa parti ini ke tahap yang lebih tinggi," katanya pada Jamuan Malam Penghargaan Wanita MCA yang diadakan di sini bagi memberikan penghargaan kepada Dr Ling dan sumbangan beliau terhadap parti dan negara.

"Agenda parti masih banyak, ianya amat panjang dan kita perlukan semua orang untuk sama-sama memberi sokongan penuh kepada parti," katanya.

Memuji pergerakan Wanita bagi pencapaian politiknya, beliau berkata parti itu pada awalnya menghadapi bantahan oleh sebilangan anggotanya semasa MCA memutuskan untuk meminda perlembagaannya bagi membenarkan lebih ramai wanita menyertai politik perdana itu.

"Kita mencapai kejayaan besar dalam 1995 (pilihan raya umum) dan pada 1999 kita menambah jawatan Wanita dalam parti dan kerajaan dan membenarkan lebih ramai perwakilan pusat. Ini telah memberikan dimensi baru dan kita melakukannya dengan baik sekali," kata Dr Ling.

Pada majlis itu, Wanita menyampaikan sumbangan RM1,488,888.88 kepada beliau, yang dikumpul oleh anggota pergerakan itu, bagi Universiti Tunku Abdul Rahman (UTAR) milik MCA.

Beliau juga menggesa masyarakat Cina untuk terus memberikan sokongan terhadap pembangunan pendidikan, terutamanya pembinaan universiti baru itu dan pusat latihan guru prasekolah kendalian MCA di Kuala Lumpur.

Dr Ling berkata rakyat Malaysia memberikan sokongan memberangsangkan bagi universiti itu dan Air Asia telah memberikan kadar tambang khas kepada beliau.

"Dengan RM1, saya dibenarkan terbang ke mana-mana destinasi Air Asia tetapi lawatan itu perlu ada kaitan dengan UTAR," katanya.

-- BERNAMA

VP VP RHM

08 AUG 2003

Mahathir-Lawat

PM AKAN LAKUKAN LAWATAN RASMI KE ALGERIA, SYRIA DAN LAWATAN KERJA KE SWAZILAND

KUALA LUMPUR, 8 Ogos (Bernama) -- Datuk Seri Mahathir Mohamad akan melakukan lawatan rasmi ke Algeria dari Ahad hingga Selasa dan Syaria dari 17 hingga 18 Ogos.

Perdana Menteri juga akan melakukan lawatan kerja ke Swaziland bagi menghadiri Dialog Antarabangsa Negara-negara Selatan Afrika (SAID) 2003 di Lembah Ezulwini dari 13 hingga 17 Ogos.

Menurut kenyataan Wisma Putra yang dikeluarkan malam ini, Dr Mahathir yang diiringi isterinya Datin Seri Dr Siti Hasmah Mohamed Ali, akan mengetuai delegasi yang terdiri daripada menteri-menteri Kabinet, pegawai kanan kerajaan, anggota sektor swasta dan media.

"Tujuan lawatan ini ialah untuk meningkatkan lagi hubungan dua hala

antara Malaysia dan dua negara berkenaan (Algeria dan Syria) dan meningkatkan kerjasama Selatan-Selatan dalam konteks Dialog Antarabangsa Perkongsian Pintar Global," menurut kenyataan itu.

Di Algiers, Dr Mahathir dijadual akan mengadakan perbincangan dengan Presiden Algeria, Abdelaziz Bouteflika.

Kedua-dua pemimpin dijangka akan bertukar-tukar pandangan mengenai isu-isu dua hala, serantau dan antarabangsa kepentingan bersama.

Dr Mahathir dan Bouteflika juga dijadual menyaksikan majlis menandatangani Perjanjian Perdagangan yang bertujuan memperkukuhkan lagi hubungan dua hala perdagangan antara Malaysia dan Algeria.

Aturcara Perdana Menteri termasuk mengunjungi Presiden Dewan Kebangsaan Rakyat, Karim Younes dan menghadiri jamuan malam negara yang dianjurkan oleh Bouteflika.

Dr Mahathir juga akan melawat Bourmerdes, sebuah bandar yang terletak kira-kira 50km dari Algiers, yang dilanda gempa bumi baru-baru ini dan menyampaikan ucap-tama pada satu sesi dialog perniagaan.

Di Swaziland, Perdana Menteri akan menyertai Dialog Perkongsian Pintar SAID/LID/EAID Global 2003 bertema "Enhancing Identity and Progress for Development through smart partnership" (Meningkatkan Identiti dan Kemajuan Pembangunan melalui perkongsian pintar.

Dialog itu yang diadakan berselang seli antara Langkawi dan venue lain di Afrika, merupakan yang keenam diadakan di benua itu. Kali ini ia akan fokus untuk menyelesaikan dan menggalakkan persefahaman dan kerjasama berhubung isu-isu yang menjadi kebimbangan di kalangan negara-negara di Selatan.

Menumpukan untuk meningkatkan kerjasama dalam aspek keselamatan, pembangunan seimbang dan K-ekonomi global dan dimensi ekonomi multilateralisme, dialog itu dijangka akan dihadiri oleh 14 ketua negara atau kerajaan negara-negara Afrika.

Di Syria, Perdana Menteri dijadual mengunjungi Presiden Syria Dr Bashar Al-Assad dan mengadakan perbincangan dua hala dengan rakan sejawatannya Mohammad Mustapha Miro.

Dr Mahathir dijangka akan berbincang mengenai isu-isu antarabangsa dan serantau serta cara-cara untuk meningkatkan hubungan dua hala Malaysia-Syria dengan pemimpin Syria itu.

"Kedua-dua Perdana Menteri akan menyaksikan majlis menandatangani beberapa perjanjian persefahaman antara Kerajaan Malaysia dan Kerajaan Syria serta antara sektor swasta kedua-dua negara," menurut kenyataan itu.

Dr Mahathir juga akan menyampaikan ucap-tama bertajuk "The Malaysian Experience in Nation Building and Development and the Management of the Financial Crisis of 1997" (Pengalaman Malaysia dalam Pembinaan Negara dan Pengurusan Krisis Kewangan 1997) serta mengadakan pertemuan dengan para ulama Syria untuk bertukar-tukar pandangan mengenai perkara yang berkaitan dengan umat Islam.

Perdana Menteri juga akan merasmikan bilik pameran kereta nasional Proton di Damsyik.

-- BERNAMA
HS HS RHM